

12 JUL 1998

MIC JOHOR DESAK KERAJAAN SELESAIKAN MASALAH CPF

JOHOR BAHRU, 12 Julai (Bernama) -- MIC Johor hari ini mendesak kerajaan supaya mencari jalan penyelesaian terhadap keengganan pihak berkuasa Singapura membenarkan rakyat dari Semenanjung Malaysia mengeluarkan caruman mereka dalam Kumpulan Wang Simpanan Pusat (CPF).

Saranan itu dibuat dalam resolusi Konvensyen MIC Johor ke-37 yang bersidang di Dewan Serbaguna Skudai, dekat sini. Ia dirasmikan oleh Presiden MIC Datuk Seri S. Samy Vellu.

Kerajaan Singapura telah mengizinkan pekerja-pekerja asing yang tidak lagi bekerja di negara itu mengeluarkan wang simpanan masing-masing termasuk dari Sabah dan Sarawak kecuali pekerja dari Semenanjung Malaysia.

Wang simpanan pekerja Malaysia yang kini tidak bekerja di republik itu telah meningkat berjuta-juta ringgit dan tindakan pihak berkuasa Singapura itu dianggap tidak adil.

MIC Johor juga menyokong penuh pimpinan Perdana Menteri Datuk Seri Dr Mahathir Mohamad dalam menangani kegawatan ekonomi negara.

Segala langkah kerajaan termasuk menggalakkan menabung, kempen membeli barangan buatan tempatan dan amalan berjimat cermat di kalangan masyarakat secara berterusan juga mendapat sokongan dan kerjasama daripada MIC Johor.

-- BERNAMA

BH PR